

無上玉皇心印經

宜春參學弟子 臣李簡易註

無上玉皇無上者上極無上彌羅真境金闕玉京
大羅純陽天宮中 妙道之祖萬帝之宗億千萬
重道炁自然至真堅固不壞真空無上法王玉皇
大天帝慈憫三界統御萬天金口所宣妙典曰心
印經心這一箇字四大部經尚說不盡當悟念慮
未起之前是箇什麼念慮既萌之後是箇什麼念
慮未起之前即是混成之性無分別之時是名真
心念慮既萌之 即是妄心不名真心真心自曠
大劫稟受得來不增不減不垢不淨亦無老死亦
無男女之別為妄心故遂粘皮着骨流浪生死

他轉去何為妄心請看古人置字如忠恕慈忍喜
怒愛慾憂悲恐懼怨憾憎恨念想思憶皆從心起
故心動則為意意轉則為情情生則為妄失却真
心矣清靜經云衆生所以不得真道者為有妄心
既有妄心即驚其神既驚其神即着萬物也所謂
真心者只這箇主張形體一點靈明知如不動分
分朗朗底便是了也更外別求甚麼認得底却要
人中磨鍊待煙消火滅鑛盡金純自然現出無位
真人自在受用如何得入輪迴所以聖人教人修
心即修道也經云唯滅動心不滅照心達磨西來
不立文字直指人心見性成佛即此心也若只如
此無去無來無住非無非色非空則又恐泥於頑